

海

國

圖

志

海國圖志卷二十一

邵陽魏源重輯

中印度各國

西域聞見錄溫都斯坦亦西域回國之大者也葉爾羌西南馬行六十餘日至克食米爾克食米爾復西南行四十餘日至溫都斯坦水亦可通兩地貿易之人多資舟楫往來不絕稱其王曰汗其都城雄壯周圍六十餘里轄大小回城三百七十餘其人深目高鼻多鬚目睛黑白光如琉璃面黑唇青言語類鳥鳴回子亦不能辨

衣做前襟頭纏花布厥土黑墳地極溽暑瘴癘爲害人  
有頭面生贅疣引之而長放之而縮者地以象耕服車  
致遠皆取給於象有牛馬無駝羊騾驢不解游牧之事  
粳糯秔稻及瓜果蔬菜靡不繁植檳榔枕榔椶櫚橘柚  
在在成林冬不凋葉人習技巧金漆雕鏤制作精奇所  
製玉器薄如蟬翼文成如髮抽金銀爲絲織綢緞氍布  
遍貨於西域各國及各回城所居穴地深數丈旁掘土  
洞爲室室亦絕精飾以金玉從無地土起屋並園亭之  
事其城村似曠邈無人煙處也郭外大澤一山水秀麗

花木蔚然居人多攜眷乘舟累月經旬游於其內多美釀尙宴會必費數百金亦多載酒泛舟於澤中者凡其地之公私事務及一切農工商旅操作交易皆於夜間爲之日出則伏國旣富庶風俗奢靡其地亦有玉山獨少白金價過黃金也最貴中國磁器或有攜至其國者爭以白玉盤碗交易而去惟恐失之而大黃尤爲至寶以黃金數十倍兌換蓋其地之一切疾病瘡瘍得大黃卽愈百不失一貴客來及大筵宴皆以大黃代茶人若經年不服大黃則必死故雖貧苦小回亦必有一半兩

大黃囊胸前舌舐而鼻嗅之其地之江河皆通海洋時有閩東海航到彼停泊多有以大黃漁利者兩廣福建之物往往有之或重販至葉爾羌轉入中國矣哈什噶爾回子買得漳絨一端上有天順字號固閩貨也其國西隅有巨澤圍數千里澤中有山圍踰千里萬峰聳峙高入雲天或曰人間第一高山也名曰牽各里麻膽達喇斯山中產獅子于秋月皎潔輒負雛于山中往來頭大而毛虬尾形如帚黃質黑章如虎皮長六七丈時登山絕頂望月垂涎咆哮跳擲猛飛吞月有飛去八九里

十餘里而墜死山谷中者其國人以豢養獅子爲上戶  
每當秋月其汗使人取獅以金鐵作柱大如甕密布層  
遮圍畜之於其中飼以牛時而吼如雷霆滿城震動人  
畜不寧椿園氏曰乾隆四十年有溫都斯坦之海門達  
爾遊至回疆予晤其人面黑唇青睛如琉璃據云彼乃  
其地之白皙者耳又云其國之西南數萬里有黑白之  
人白者如雪黑者如漆國在大海之中得毋卽東粵之  
所謂黑鬼白鬼者歟因細談其地之事甚詳與予向所  
聞無異而牽各里麻騰搭拉斯之山高聳至極靈蹟最

著其卽古人所謂日繞之峯歟顧山雖至高無出沒日

月之理四圍皆水舟楫可通亦無所謂弱水焉案溫都一作痕

都一作與都卽印度身毒之轉音也坤輿圖職方圖皆作莫臥爾國蓋中印度也其西北大澤卽所謂裏海也

裏海中高山而疑爲須彌陋不足辨其地暑而多瘴多雨類閩廣水土惡

劣之鄉而山有寶地生毛故人繁而殷富惜乎象胥通

言不能盡解其說所得考核存據者亦僅參半焉爾

萬國地理全圖集曰亞加者古時中印度之省會係蒙

古印度王之都殿宇官衙光曜燦耀形勢在北極出地

二十七度十一分偏東七十七度五十三分有塔建在

平坦周視九十里所有居民大半崇回教並不崇拜菩薩其廟內無偶像並無燒香惟念經叩頭而已回回教門之人數百萬在五印度各處居住昔蒙古軍侵國強令土人棄絕佛像否則誅死故此印度多奉其教至今不絕其近城有古王之墓高如疊塔一周幾十丈煥然齊整其礮臺四面險固此際鄰國咸窺毫無戰釁故生意復興道光十三年以此地爲都會又亞北得希者古回回王之京明嘉靖五年蒙古汗乘機侵奪創立大國歷二百三十五年令五印度列國進貢乃佞臣結黨



變詐蜂出，乾隆二十五年，王懦無能，投降英人，蒙其俸祿，安居本都，但戰鬪不息，爲敵國侵擄，於是英官征逆，靖國宣威，回回王現時，駐官無權，惟享虛榮，受英俸祿，足以養宗室而已。其都廣大，其殿遼濶，其民各服英權，歷年泰平。

東印度各國

海錄烏土國，在暹羅達牙西北，疆域較暹羅更大，由達牙陸路行四五日，水路順風約二日到，佗歪爲烏土屬邑，廣州人有客於此者，又北行百餘里，到媚麗居，又西

北行二百餘里到營工又西行二百餘里到備姑俱烏  
土屬邑王都在益畫由備姑入內河內河即恒河會水  
大金沙江海口水  
行約四十日方至國都有城郭宮室備姑鄉中有孔明  
城周圍皆女牆參伍錯綜莫知其數相傳爲武侯南征  
時所築入者往往迷路不知所出云北境與雲南緬甸  
接壤雲南人多在此貿易衣服飲食大約與暹羅同而  
樸實仁厚獨有太古風民居多板屋夜不閉戶無盜賊  
爭鬪國法極寬有過犯者罰之而已重則圈禁旬日而  
釋無殺戮撲楚之刑實南洋中樂國也男女俱推髻婚

姍峇同中國死葬於山不封不樹土產玉寶石銀燕窩  
魚翅犀角泥油紫景兒茶寶石藍者爲貴以其難得也  
泥油出土中可以燃燈紫景亦土中所出可代印色自  
安南至此及南洋諸國沿海俱有鱷魚形如壁虎嗜食  
人土番有被鱷吞者延番僧咒之垂釣于海食人者卽  
吞鈎而出其餘則不可得也由備姑西北行沿海數千  
里重山複嶺并無居人奇禽怪獸出没號叫崇巖峭壁  
間多古木奇花所未經視舟行約半月方盡亦海外奇  
觀也○徹第岡在烏土國大山之北數十年來英吉利

新闢之地、未有商賈、其風俗土產未詳

案此皆印度之東境卽古柯伎

國也

又曰明呀喇

卽孟加臘

英吉利所轄地、周圍數千里、西南諸

番一大都會也、在徹第岡海西岸、由徹第岡渡海、順東

南風、約二日夜可到、陸路則初沿海北行、至海角、轉西

又南行、然後可至、爲日較遲、故來往都出海道、其港口

名葛支里港、外沿海千餘里、海水渾濁、淺深叵測、外國

船至此不能遽進、必先鳴礮、使土番聞之、請於英吉利

命熟水道者、操小舟到船、爲之指示、然後可、土番亦必

預度其深淺以泡志之泡者截大木數尺製爲橈形空其中繫之以繩墜之以鐵隨水道曲折浮之水面以爲之志士番謂之泡每一望遠及轉折處則置一泡然外人終不能測是殆天險也港口有礮臺進入內港行二日許到交牙礮臺又三四日到古里噶達英吉利官軍鎮明呀喇者治此有小城城內唯住官軍商民環處城外英吉利官吏及富商家屬俱住漲浪居漲浪居者城外地名也樓閣連雲園亭綺布甲於一國英吉利居此者萬餘人又有敘跛兵五六萬卽明呀里士番也酋長

有三其大者曰卽攸士第其次曰尼里又次日集景皆命于其王數年則代國有大政大訟大獄必三人會議小事則聽屬吏處分其統屬文武總理糧餉一人謂之辣亦數年而代其出入儀仗較三會長特甚前有騎士六人後有四人左右各一人俱穿大紅衣左右二人裝束俱同辣唯辣所穿衣當胸繡八卦文爲異耳凡鞠訟上下俱青衣唯三會長兩肩有白絨緣頭戴白帽會長上坐客長十人旁坐客長客商之長也每會鞠必延客長十人旁坐欲與眾共之也其獄必僉曰是然後定讞

有一不合則復鞠雖再三不以爲煩然怙奢尙利賄賂  
公行徒事文飾無財不可以爲說也其土番有數種一  
明呀里一夏里一巴藍美明呀里種較多而巴藍美種  
特富厚明呀里食牛不食豕夏里食豕不食牛巴藍美  
則俱不食富者衣食居處頗似英吉利以華麗相尙貧  
者家居俱裸體以小幅布圍其腰臍以掩下體男女皆  
然謂之水慢無來由番亦多如此有吉慶則穿長衣窄  
袖其長曳地用白布二丈纏其頭以油徧塗其身所居  
屋盡塗以牛糞交易以文螺壳爲貨貝娶妻皆童養夫

死鬻髮而居各種不相爲婚男子胸蓋數小印額刺紋  
女皆穿鼻帶環巴藍美死則葬于土餘俱棄諸水明呀  
里間有以火化者更有伉儷敦篤夫死躍入火中以殉  
者自此以西地氣漸寒中國人居此者可穿夾衣非若  
東南洋諸國四時俱單衣也土產鴉片煙硝牛黃白糖  
棉花海參瑇瑁訶子檀香鴉片有二種一爲公班皮色  
黑最上一名巴第古喇皮色赤稍次之皆中華人所謂  
烏土也出於明呀喇屬邑地名巴旦孛其出曼達喇薩  
者亦有二種一名金花紅爲上一名油紅次之出馬喇



他及盎几里者為紅皮出孟買及卽杜者則為白皮近  
 時入中華最多其木似嬰粟葉如靛青子如茄每根僅  
 結子二三顆熟時夜以刀微割其皮膏液流出凌晨收  
 之而浸諸水數刻然後取出以物盛之再取其葉曝乾  
 末之雜揉其中視葉末多少以定其成色葉末半則得  
 膏半然後捏為團以葉裹之子出膏盡則拔其根次年  
 再種

案明呀喇海國聞見錄作珉呀或人  
 又作孟阿拉或作孟加臘實皆一地

海國聞見錄小白頭國東鄰珉呀國一作明呀喇即珉  
 今孟加臘也

呀人黑穿着皆白類似白頭英機黎荷蘭佛蘭西聚此

貿易珉呀天竺佛國也珉呀之東南遠及暹羅珉呀之南臨海珉呀之北接刺麻西藏及賽馬爾丹國屬

粵商回述孟阿拉地宜種植百物叢生終歲南風並無冬夏每洋銀一圓值彼處銅錢一百文白米一升值彼處銅錢一文其鴉片煙四季種收周流不息各國夷人均向彼處收買每公土一件價銀一圓白土一包價銀六錢國土所抽稅每土一件約銀二圓運至中國每碼土計成本銀四圓有奇從前可賣至八九圓聞去年中國禁令森嚴彼處夷發售甚艱價亦太賤每船煙土所

售銀兩僅敷來往盤費所獲既無大利各夷均不願作此鴉片生理本年夏間由彼處起程聞英吉利國王以中國嚴禁有傳令停止製造之說

萬國地理全圖集曰榜葛刺國東印度也海口河流疏派田畝豐盛物產如山如糖硝棉花鴉片漩餅胡絲五穀等貨其省會曰甲谷他在安額河之濱於北極二十一度二十三分偏東八十八度二十八分天下互市之處康熙七年英商始建市館築小礮臺屋宇僅七十間乾隆十七年土君擅壞其房囚其人當時英官報仇用

兵驅逐虐主總歸其管轄焉都邑廣大居屋如殿其街  
直而廣兩面高樓粉白如雪內有學校文院各等文藝  
之館男女讀書務學勉爲良善全印度之總帥劄駐甲  
谷他管下英國軍士三萬丁土軍二十三萬丁文官俱  
幼時來自英國學習土話自下升擢俸祿甚厚以理地  
方各事所建礮臺四圍廣大敵軍斷難取據深溝高壘  
金城湯池四面險固水路可通內地各大邑若水淺流  
急用火輪船牽其河舟不待風潮上下不絕城內財帛  
不勝數凡他省及內地富商皆雲赴甲城以包兌包送

○甲部東勢他加城居民二萬丁，百姓立機房，造織細  
幼布帛，昔總帥劄駐之省會，此時惟見頽牆壞壁。○甲  
部之西八拏邑居民稠密，造硝種罌粟青黛，田種玫瑰  
醪醖，摘花葉造花露，居民好香撲鼻，常用以調飯洗身。  
○甲部西南北拏力邑印度教門中著名之區，謂是地  
之中心街衢甚窄，房屋瓦造，高五六層，眾生奔馳如影  
不絕，居民計六十萬丁，據印度人說菩薩造成其城，以  
爲聖處，信其教者，詣邑燒香奉拜偶像，以免地獄之罪。  
又言沐浴其河內者，諸罪一概洗滌，直上天堂，此印度

佛敎中之恆河也。東印度之東爲緬甸，北印度之東爲廓爾喀，及西刻等國。此數國皆近西藏，貢於中國。近日西刻及廓爾亦爲英吉利駐印度之兵所攻服。故東印度孟加臘已與西藏通互市。惟北印度與鄂羅斯國游牧部相接壤，至今爭戰未息。蓋鄂羅斯亦貪印度鴉片之利爾。

魏源西藏後記曰：滇南師範有言：中國赴于竺佛國，亦有兩道。一自雲南騰越州而南，由緬甸城轉西，以至東天竺。凡三千五百里，再至中天竺，又千有一百里，共五

千有百里，一百雲南麗江而距進藏，至中天竺北界二千里，又千有六百里，而至中天竺，僅三千有二百里。視南道經千有九百里，以地望準之，雲南之騰越州正與天竺東南相值，止因其間赤髮野人隔之故。一則迂道南行千有七百里，至緬甸，然後轉西至東天竺，又西北至中天竺檀那國，計三千八百里。一則迂道西行入藏，然後轉南，亦至檀那，計三千二百里，使能取道野人徑直西上，則色田、緬甸、藏兩迂道而自騰越達天竺，不過千有九百里。野夷若入版圖，則與天竺境壤相接，昔漢

武開西南夷，欲由梁州達大夏，偉矣哉！西藏記曰：由後藏塞爾地方西南十八程，至宗里，又八日，至白木戎部落，其地北接後藏，西接白布南，至小西天北界，至小西天界，南行十日，至其國都布爾牙部落，始上海船行半月，至大西天，小西天爲東天竺，大西天爲中天竺，又曰：後藏札什倫布西南與布魯克及白布等部交界，白布卽贊普取白布國王女之地，布魯克卽往天竺之路也。又一路由阿里西南二千餘里，入厄納特珂克，卽中天竺，其中藏前藏，東南則以怒江爲界，江以南卽狃狃野。



人每藏中有死罪則驅之過江聽野人殘之

以上西藏記然

則怒江南岸逾野夷西境卽布魯克部與東天竺近而怒夷自雍正中內附歲輸皮貢於騰越界非不可闢之區則天竺與中國亦非不可接之境惟是東天竺卽今南洋孟加臘地久爲西洋英吉利所據專產鴉片煙流毒中國誠能募騰越士勇萬人渡江而西南長驅擣其背腋通絕域爲鄰壤實制西夷之一奇或曰大金沙江自藏經緬其入海之口卽東天竺界其水關於大江造舟藏地順流建筏尤倍捷于陸然有舟師之便而又有

緬夷之梗利害亦適相當也

又乾隆征廓爾喀記四川雲南之西爲烏斯藏烏斯藏之西南爲廓爾喀廓爾喀之西南爲五印度印度古佛國在葱嶺西南瀕大海去烏斯藏尙遠或以烏斯藏卽古佛國者非也自四川打箭爐西行二十餘驛至前藏四十二驛至中藏又十二驛至後藏又十二驛至濟隴又三十驛至石宿堡爲後藏極邊地踰橋而西則廓爾喀矣廓爾喀本巴勒布國舊分葉楞部布顏部庫木部于雍正九年各奉金葉表文貢方物後三部并吞爲一

遂與後藏鄰自古不通中國其與中國構兵則自乾隆五十五年內犯西藏始初後藏班禪刺麻以四十六年來朝祝高宗七旬嘏中外施舍海溢山積及班禪卒于京師資送歸藏其財皆爲兄仲巴呼圖克圖所有旣不布施各寺廟與唐古特之兵又擯其弟舍瑪爾巴爲紅教不使分惠于是舍瑪爾巴憤愬廓爾喀藉商稅增額食鹽糶土爲詞興兵闖邊唐古特兵不能禦而朝廷所遣援剿之侍衛巴忠將軍鄂輝成德等復調兵賄和陰令西藏堪布等私許歲幣萬五千金按

兵不戰遽以賊蹙乞降飾奏而諷廓爾喀酋入貢受封  
國王廓爾喀既侮藐內地次二藏中歲幣復爽約于是  
廓爾喀以責負爲名再舉深入後藏札什倫布西南左  
有曲多江鞏右有彭錯嶺峭壁連岡咽喉天險賊步卒  
數千自聶拉木入其時蕃漢官兵苦分兩路一扼曲多  
江鞏遏其前一繞赴彭錯嶺截其後則廓爾喀深入無  
援可不戰潰也駐藏大臣保泰一聞賊至則移班禪于  
前藏并請移達賴班禪于西寧欲以藏地委賊且札什  
倫布地負山面江形勢鞏峻刺麻數千乘壙可守以待

援而仲巴呼圖克圖挈資先逸刺麻濟仲札蒼等復託  
言卜諸吉祥天母不宜戰眾遂潰賊大掠札什倫布全  
藏大震爾大喇麻飛章告急侍衛巴忠扈 駕熱河

聞變畏罪自沉水死時鄂輝為四川總督成德為四川  
將軍因盡以罪委之謂巴忠解唐古特語故私議皆其  
一人所為已二人不知也及奉命赴藏剿禦又按程緩

進 上知二人不足恃乃 命嘉勇公福康安為

將軍超勇公海蘭察參贊調索倫滿兵及屯練土兵進  
討其軍餉則藏以東川督孫士毅主之藏以西駐藏大

臣和琳主之濟隴邊外則前川督惠齡主之賊狃于上年賄和之役半運所掠歸國半屯界不去鄂輝成德等遂奏賊退欲卽以蕲寧上切責不許明年二月將

軍參贊由青海至後藏四月連敗其屯界之賊盡復藏地六月遂大舉深入恐賊繞襲後路遣領隊大臣成德岱森保及總兵諸神保各出左右一路以分賊勢而大軍出中路海蘭察將三隊爲前軍福康安將二隊繼之賊據木古拉山阻水拒險將軍議令護軍統領台斐英阿與賊相持而大軍別趨間道海蘭察繞山後出賊營

之上，福康安由間道合衝賊營，克其木柵石卡數十，追奔至雍野雅，而成德諸神保亦克鐵索橋，進會利底廓夷舉國震懾，遣使詣軍前乞降。將軍參贊嚴檄斥之，七月再進，六戰六捷，殺賊四千，涉賊境七百餘里，將近其國都陽布之地，隔河大山，賊以十營踞山巖守，水深山斗絕，山後卽其國都也。福康安欲逾橋攻之，海蘭察力持不可，福康安自引兵渡橋仰攻，果不利，賴海蘭察接應退賊。方是時，其國境南鄰印度之地，久爲英吉利屬國，與廓夷積釁，聞廓夷受兵於中國，則亦出兵攻其邊。

鄙廓夷兩支強大敵，洵懼無計，且恐我軍聞而氣奮也。再遣人詣軍，卑詞哀乞，將軍參贊議以賊境益險，而踰八月，卽大雪封山，不可老師，乃允其降，盡獻還所掠藏中財寶及塔頂金冊印，歸前被執之丹津班珠爾等，并獻沙瑪爾巴之尸，貢馴象番馬工樂，請永遵約束。班師上本欲俟事平，裂其土授諸土司，而酬福康安以郡王爵，及聞已受降，乃允其請，留番兵三千，漢蒙古兵一千，戍藏，是爲官兵駐藏之始。後藏至廓爾喀，故有孔道賊嚴守之，故我師覓間道入，其峭絕處，左壁右湍，不



容一騎將軍參贊亦時步進故所貢象竟不能達而烏  
拉嶺上下百二十里必窮一日之力踰之稍昏黑卽不  
能覓路且有雪城若門洞深數十丈人往來者不敢語  
否輒有雪大如屋壓而殛之廓爾喀寇藏時運贊歸國  
者二千人過嶺凍死殆盡蓋葱嶺之南脊天所以限中  
西也險倍金川遠踰回部爲漢唐兵力所未至幸其土  
卒皆跣足每戰仿古法先約期而後交綏我軍不顧輒  
先發揜襲往往猝爲我乘自大創以後至今貢獻不絕  
其國西南與五印度相鄰其南海號印度海近日印度

之孟加臘及孟買等國爲西洋英吉利所據乾隆六十年英吉利使臣入貢自言前歲大將軍率兵至西藏西南之的密部落時彼國兵船亦曾相助倘嗣後有需用西洋兵者情願効力 朝廷始知前此廓爾喀之役其南界亦有邊警外患也道光二十年英吉利夷人入寇粵浙廓爾喀亦遣人稟駐藏大臣言小國與里底所屬披楞相鄰每受其侮今聞里底與京屬構兵京屬屢勝臣願率所部往攻底里屬地以助天討時駐藏大臣未知所稱里底卽英吉利所稱京屬卽謂中國之廣東

省所稱披楞屬地卽印度荅以蠻觸相攻 天朝向  
不過問卻之蓋英吉利國都雖遠在大西洋而其屬國  
印度則與廓爾喀接壤世仇構釁故我攻廓則英夷乘  
之我攻英則廓夷亦願助之云

臣源曰廓爾喀界西藏及東印度攝兩強敵之間然內  
貢中國而不貢印度夷近日英夷西與鄂羅斯構兵東  
與中國結釁故廓爾喀欲乘兩大國之勢以攻印度云  
印度地產鴉片煙英吉利關稅歲入千萬計其兵船入  
犯中國者十九皆孟加臘之人誠能聽廓夷出兵之請

獎其忠順，擾彼腴疆，擣其空虛，牽其內顧，使西夷失富強之業，成狼狽之勢，亦海內奇烈也。鄂羅斯地袤二萬里，與中國首尾相接，地大兵強，西洋所畏，其與我互市之地，則有陸而無海，英夷之與我互市，則又有海而無陸。近日鄂羅斯屢與英夷爭韃韃里之地，其地橫互南洋，鄂羅斯得之，則可以圖并印度，故與英夷連年血戰。雍正五年，俄羅斯攻取西藏西南五千里之務魯木，以地尚佛教，遣人至中國，學喇嘛，當即與廓爾喀相近。若能許鄂羅斯海船赴粵貿易，連絡彌利堅佛蘭西等國，皆英夷仇敵，則英夷之兵船不敢舍其境而

遠犯中國英夷在印度大兵船止百艘以其半入寇中國其餘皆分守各境不敢遠離恐他國乘其虛夫以夷攻夷之效咫尺見者視爲迂圖乾隆嘉慶間一  
封暹羅遂足以西制緬甸東制安南善奕者或一閒著  
而全局皆生况以宅中馭外之勢制仇讐四結之夷哉

海國圖志卷二十二

邵陽魏源重輯

北印度各國

統志巴勒提在博洛爾南宸都斯坦東與之接境

道由回部漢唐罽賓近東地也

寓為唐西域記羣山近之畢迦試國

接中有長河有十伯特牝穆巴克什米爾諸地

分兩部落酋長

默默帕爾及烏蘇完分統之各有眾八千餘人舊在葉爾羌貿易乾隆二十五年內附

西域見聞錄克什米爾回子一大國也

案宋史曰迦濕彌勒國元經世

地里圖曰乞石迷耳英夷地國曰夾氏米里皆字異音同

葉爾羌西南馬行六十餘

日可至其國中隔一冰山人畜至此須土人駝牽而過  
其險甚於木素達板其人深目高鼻黃睛多鬚衣圓領  
窄袖無髮辮飲食尤多禁忌禮拜尤虔語言強半可通  
稱其君曰汗所屬回眾近百戶城池周三十餘里椿園  
氏曰嘉峪關外多流沙間有水泉沙石兀突怪惡不生  
草木至克什米爾以西以南時既清淑山川秀麗別有  
天地矣而溫都斯坦各國極熱多雨無霜雪一切飛潛  
動植與中國之闊廣無異豈以其近海之故歟人習工  
巧製造詭異

案此所云克仁彌爾之冰山卽唐  
元裝西域記北印度之大雪山也

皇清四裔考曰愛烏罕在巴達克山西南部落最大漢書西踰蔥嶺有北道北道出大宛南道出大月氏此當爲大月氏地有三大城曰喀奔曰堪達哈爾曰默沙特喀奔城南北西面山東面平曠堪達哈爾城四面俱山其汗愛哈默特沙居之默沙特城舊屬伊蘭愛哈默特沙征取之統治三城事耕種無游牧勝兵十五萬軍器烏槍腰刀之屬無弓矢善田作戶有餘糧少物采自兼并溫都斯坦部後資其金絲緞匹物力加豐亦有奄豎多取諸溫都斯坦商人不至其國乾隆二十四年大兵



逐霍集占將入愛烏罕境爲巴達克山酋素爾坦沙擒  
獻其屬下有奔愛烏罕者唆其與師問罪於巴達克山  
素爾坦沙懼遣使具言諸不得已狀愛哈默特沙云

大清國地廣人稠見於記載未知道路遠近今擬與爾

部偕往投誠遂屢貢焉愛烏罕亦作阿布額尼亦作甲布爾所屬阿拉

克巴拉斯阿爾雜拜延舊隸伊閑由喀奔至堪達哈爾

二十八程由堪達哈爾至默沙特二十程北接布哈爾

西有默克札志爾等數部落中隔沙漠過此爲西海南

有思布部落過思布亦海也案西海皆裏海非地中海也

地里備考曰阿附干國卽加布爾在亞細亞州之中印  
度之西北北極出地二十八度起至三十六度止經線  
自東五十七度起至七十度止東至塞哥國西連白爾  
西亞國南接北羅吉國北界達爾給國長三千二百餘  
里寬約二千里地面積方約十五萬二千七百餘里烟  
戶四兆二億日本國地勢東南西南平原坦闊其餘各  
方峻嶺重疊湖河甚少河之長者惟一名曰印度河又  
名心德河湖之大者有三一名盧克湖一名烏勒爾湖  
其田土西方則饒瘠過半沙漠無垠餘方則隴畝膾腴

穀果豐盛土產鐵錫礬鹽窩宅礪砂硫磺烟葉絳花阿  
魏青黛丹參甘蔗地氊等物地氣互異冷熱俱極王位  
相傳長幼皆得臨御諸臣公舉惟賢繼立所奉之教乃  
回教也技藝庸陋貿易平常商賈負販結隊而行粵稽  
本國來歷渺茫明武宗正德元年有巴卑爾者既獲加  
布爾濟斯尼于達爾等處遂卽位稱汗歷傳二百餘載  
康熙五十九年復取白爾西亞國歸於一統越十七載  
白爾西亞國君那的爾沙興師擊逐反取本國迨薨後  
本國復興自爲一國時君名亞美里沙乾隆四十五年

傳至塞曼沙者被弟馬慕篡逐以後綱紀敗壞國亂民  
變越十餘載塞哥國勞爾地會長林日星者乘機侵占  
其兼攝諸地亦皆背叛惟阿付干西斯丹等處尙存現  
改九部一名加布爾乃本國都也建於平原之中街市  
繁華風景美麗一名羅各曼一名日刺拉巴一名合斯  
那一名西維一名干達合爾一名發來一名都札克一  
名伊隆達爾其通商衝繁之地曰加布爾曰干達合爾  
曰合斯那

案又名阿付顏尼卽愛烏罕之轉音也

外國史畧曰甲布國或曰押安國或曰加布額尼前屬  
白西亞國及北路治北及西域游牧部東及五印度西  
連白西國廣袤方圓萬六千里居民千四百萬多山谷  
故氣候土產皆異在印度界內惟此地無深淵大河山  
頂積雪不消而山內極熱地肥磽不一百姓稀少農夫  
有五等每年二收多麥產油並阿魏多駝及繇羊犬善  
走猫亦美鷹能捉鹿民樸實有仇必報百年不忘恥買  
賣不肯家居以持械爭戰爲要務山峽甚多有外人入  
之卽絕其歸路故敵國不敢侵而屢伐他國獲勝嘗據

五印度地後爲白西國所服降爲藩屬道光十七年義  
羅斯國愆患其民畔白西復動干戈而白西國王率兵  
圍其北界之黑臘城於是甲布別立新主調兵以拒退  
白西國道光二十一年冬土民乘冬凍攻擊英兵英兵  
乏衣食多斃者次年英兵攻之仍令前王攝權地始安  
靜○其都曰加布額尼城甚堅固英人破之干他哈亦  
交界之城街廣而直城長而方民多甲布之族與白西  
國所屬之黑臘國交界其國君每駐此與白西國有隙  
地豐盛民壯健○哈薩克甲布兩地之間有地曰甲非

勒坦山地奉佛教與附近甲布之回人交戰族類甚多地狹險多巖居出葡萄南果民美丰姿但未向化因在巖內負固回族亦難侮之無王無君惟聽命於長老好飲酒面白每將其女賣與回人爲奴最輕忽無信若非山巖險固久爲他國降服矣

外國史畧曰北路治地南及印度地北連甲布東及英藩屬地西連白西亞國廣袤方圓九千一百五十四里居民二百七十萬地分五部曰撒拉文曰云他瓦曰以哈拉文曰路土古地天氣殊異高峯夏亦雪積平地則

熱甚野長六十五里闊四十里東多山高者八百丈有  
金銀銅錫鐵鉛等礦出蘇花五穀青黛居民分兩族多  
遊牧頗誠實喜接旅客亦有印度白西人其宗派各有  
本會不相合駐其拉之地每年征餉二十五萬圓兵四  
十有戰則召募民壯至三萬五千之多曾進貢于甲布  
國此地形勢未經詳察

案俾路芝南濱印度海西北接巴社居愛烏罕之南  
西恆河迤西也

地里備考曰黑拉德國又名東哥羅三在亞細亞州之



中印度之北北極出地三十三度起至三十六度止經線自東五十八度起至六十五度止東南界阿付干國西連白爾西亞國北接達爾給斯丹國長約一千五百里寬約七百里地面積方約八萬里烟戶一兆五億口地勢嶄巖岡嶺絡繹湖河甚少田畝肥饒穀果豐稔草木紛繁牲畜充牣土產鐵絲麻煙阿魏蒜花香料藥材鴉片等物地氣溫和王位世襲所奉之教乃回教也技藝精良商賈輻輳通國分爲三部一名黑拉德乃國都也建于平原之中昔甚富麗今稍凌替一名夏般一名

巴米昂

瀛環志畧曰阿富汗波斯東境明時裂波斯數城自立  
爲國前此固統於波斯別無名號也世多傳其兼并溫  
都斯坦今攷溫都斯坦乃五印度總名與阿富汗爲鄰  
者爲北印度之塞哥國兩國本以印度河爲界阿富汗  
嘗逾河而割塞歌之西境迨後塞歌亦逾河而割阿富  
汗之東境所謂疆場之邑一彼一此者耳西域聞見錄  
謂敖罕與溫都斯坦地界毗連各以威力相制迭爲強  
弱今攷與溫都斯坦爲鄰者阿富汗之外別無敖罕國

名蓋阿富汗一作愛烏罕愛烏合音近敖遂誤以愛烏

罕爲敖罕而安集延之浩罕都城亦稱敖罕

一作豪罕  
又作霍罕

論者遂以此譏椿園之謬妄謂其移極北之回部於南方實則轉音之淆訛而不足深訛也又聞見錄云敖罕之人種類不一有與內地回子相似者有與安集延相似者有與土爾扈特相似者有毛髮拳曲與峩羅斯相似者又一種人亦回子衣帽鬚繞頰如蝟而赤染以茜其人多力善用木矛西域人多畏之又一種人圓領大袖衣冠類漢唐貌清奇似朝鮮人或謂是後漢之遺種

云又云放罕西域之大國亦西域之亂邦詐力相尙日  
日皆逐鹿之勢蓋自古而然云余攷西洋人地圖阿  
富汗境土縱橫皆不過三千里幅員既無莫大之勢種  
族安得如許之繁蓋其國本波斯所分迨後由分而合  
復由合而分西域不知波斯國名遂以波斯各部種類  
並歸之阿富汗耳泰西人亦稱波斯客籍流寓種類甚  
多語音不一有額力西者即西有阿丹者即阿有羅馬  
者有土魯機者正與聞見錄所云相合至兩國再合再  
分兵爭數起又復時時內訌迭相篡奪所云日日皆逐

鹿之勢殆不虛也

俾路芝

密羅既忽魯謨斯

北羅吉思布

在阿富汗之南亦回部也東

接西印度西接波斯南臨印度海東西約一千七八百  
里南北約六七百里岡阜重疊沙磧廣莫田土甚瘠僅  
敷耕食時序和平物產與阿富汗畧同國無王分六部  
曰薩拉彎曰加支干達瓦曰倭拉彎曰盧斯曰美加蘭  
曰古義斯丹六部各有酋長國小而強習於攻戰與英  
吉利所屬之印度西部時時構兵互有勝負

按俾路芝立國不知所自始明初鄭和等使西洋乃有

忽魯謨斯國名今四裔考之思布皆指俾路芝也

地里備考曰北羅吉國一作比路治國亞細亞州之中  
印度之西北極出地二十五度起至三十度止經線自  
東五十八度起至六十七度止東至塞哥新的亞二國  
西連白爾西亞國南接疴曼海灣北界阿付干國長約  
一千餘里寬約六百二十里地面積方約十萬餘里烟  
戶三兆餘口本國地勢岡陵重疊沙漠廣闊湖河甚小  
逢夏畧涸田土頗瘠樹林稀疎五穀百果僅敷所需各  
種鳥獸罔不充物土產金銀銅鐵錫鉛礬窩宅硫磺

礪砂花石茜草繇花等物地氣溫和四季相適至于朝  
綱諸酋統轄各分部所奉之教乃回教也技藝庸拙  
貿易清淡通國分爲六部曰薩拉灣曰加支干達瓦曰  
倭拉灣曰盧斯曰美加蘭曰古義斯丹

地球圖說皮路直坦國一作比路斯其酋亦號士丹猶  
痕都之號斯坦也東界天竺國南界亞拉北亞海西界  
白耳西亞國北界亞加業坦國其百姓約有二百萬之  
數都城名基拉城內民二萬半述釋教半述回回教其  
風俗亦有不善遇財卽劫多居穹帳少瓦屋人尙規矩

又有不居於帳篷者卽不良之徒也嘉慶年間本與亞加業坦國爲一國後各自分析立主國內有極大之曠野有極峻之高山故少膏腴惟牧羊馬

地球圖說亞加業坦國東界天竺國南界皮路直坦國西界白耳西亞國北界大布加利亞國其百姓約有五百七十萬之數皆半述釋教半述回回教以收羊馬爲生南有曠野東南北復有高山惟中央平坦人民之狀與皮路直坦國相似風俗亦無異惜其民心不睦時相矛盾國王失柄不從其命心惟愚拙何異天竺之民也



地里備考曰布丹國一名廓爾喀國在亞細亞州印度  
西藏二國之間其國土自北極出地二十六度二十分  
起至二十九度止經線自東八十六度十分起至九十  
二度五十五分止東至亞桑國西連阿付干國南接榜  
加刺地方北界西藏國長約一千六百里寬約七百里  
山陵叠起人烟稠密田土肥饒湖河潤澤五穀百果鳥  
獸草木靡弗蕃衍絛花大黃黑金紋石寶爲豐盛地氣  
溫和不奉之教乃黃衣釋教人民僇勉貿易興隆通國  
分爲二大部一曰德白拉乍乃國都也一曰比斯尼

俄羅斯與印度構兵記曰印度海與後藏緬到曰鄰廓

爾喀介其中其孟阿臘東印度也孟邁南印度也其溫

都斯坦中印度也溫都一作與都一作痕都即印度之轉音克阿彌爾古屬

賓愛烏罕古大月氏北印度也印度河兩岸巴社各回

國西印度也皆在葱嶺西南接中國西域近日英吉利

自稱管理五印度蓋惟北西印度未全為所據其東南

中三印度則幾盡并之矣然康熙雍正間英夷僅據孟

阿臘孟邁二埠未窺印度全境而鄂羅斯方與普魯社

構兵亦未南收葱嶺西地中海東皆統於天方之回教

乾隆中西域甫平溫都斯坦尙與巴達克山構兵旋爲  
愛烏罕所并嘉慶以來鄂羅斯由黃海攻服黑海各部  
又沿裏海南侵英夷亦并溫都斯坦泝恆河北上于是  
葱嶺西除布哈爾愛烏罕諸大國外凡裏海游牧回部  
號韃韃里者皆并於鄂羅斯夾恆河及南洋之城郭回  
國半屬於英吉利裏海卽加士比唵海近於鹹海亦名  
北高海明史謂游牧之蒙古曰韃韃  
西洋人謂游牧之回部曰韃韃皆音近英吉利及鄂羅斯二境中所隔數  
國則愛烏罕爲大或稱阿付顏尼或曰甲布爾道光十  
九年愛烏罕與沙蘇野相攻沙蘇野會請救於英夷英

吉利遂起印度各部落之兵并力攻破愛烏罕愛烏罕  
之酋亦走愬于鄂羅斯鄂羅斯復起駐防韃靼之兵南  
攻巴社取機洼取木哈臘欲恢復愛烏罕故地以直攻  
印度英吉利兵據險力拒于是英鄂二邊境僅隔興都  
哥士一大山而血戰無虛日矣興都卽印度二字音轉  
其山界北中二印度之  
間愛烏罕國及沙蘇野部落皆在是山之南機洼及木  
哈臘皆在是山之北而沙蘇野之部落亦有軼出山北  
者是爲英鄂交惡之由與交兵之界沙蘇野三以道光  
十八年爲愛烏罕所破走投援印度時英吉利鎮守印

度之大兵帥曰□□□副兵帥曰沙機尼遂于十九年  
七月起孟阿臘孟邁溫都斯坦三部之兵使沙機尼將  
之而沙蘇野酋自以所部兵鄉導時愛烏罕酋自都於  
加模爾城遣其次子以兵三千五百守牙尼士城長子  
以兵數千守加布爾城牙尼士城本險固干其城門前  
復增重濠重牆守禦甚固英吉利軍先營近郊誘戰不  
出乃督馬礮軍駱駝礮軍步礮軍三路進攻此三軍謂  
以駱駝負礮  
以人扛礮也又開天礮擊之天礮者仰空發礮飛墜城  
中遂偪城而營并以兵扼加布爾援軍之路愛烏罕之

會遣其長子領千五百騎步兵三千由加布爾城赴援  
夾攻後路爲沙蘇野部兵擊退次日遂會各營專攻城  
門更番迭進城內兵亦死力鏖戰旣而天礮從空而下  
城中震競爭潰遁凡二晝夜拔其城擒其次子乘勝兩  
路進攻加布爾城愛烏罕之酋同其長子率兵萬有三  
千守格麻關而軍士奪氣望風解體父子率三百騎走  
保麻緬棄芻糗火礮輜械山積英吉利遂據二城遣沙  
蘇野王復國酌留歐羅巴兵溫都斯坦兵及愛烏罕新  
降兵助守其地此英夷侵北印度之事也愛烏罕旣遁

麻、緬、則遣使乞師於鄂羅斯。鄂羅斯鎮守韃韃里之兵  
帥久豔東南印度之富，特隔于各回部。至是乘各部自  
闕謀，由巴社以圖印度。巴社者

心國即來粵貿易

之白頭番，所謂港脚者也。小白頭為溫都斯坦，大白頭  
為巴社。巴社雖不屬英吉利，而與英吉利睦。故英帥律  
屋蘭者，以兵助巴社拒之。鄂羅斯復以收逃奴為名，襲  
破機洼及木哈臘二回部，又攻取沙蘇野所屬三部之  
在興都哥士山北者，遂駐兵荷薩士河與英吉利中印  
度接界，并使人習印度法律言語，又購木哈臘人鄉導。

無一日忘印度而英吉利亦嚴兵愛烏罕為備議還舊  
會于故地以息外構而增藩蔽議未定而廣東事起是

時 欽差大臣赴廣東禁鴉煙罷互市聲其罪惡布

告諸國其佛蘭西彌利堅讐英夷者咸稱快廓爾喀亦

白駐藏大臣願率所部收東印度姚瑩康輅紀行廓爾

與英吉利有隙道光十八九年間英吉利初擾廣東廓

爾喀求助之餉往攻第里八察大臣不知第里八察即

孟加刺也不許及英夷大擾江浙廓爾喀自以兵乘虛

攻之大有破獲英夷回救不及乃以所得中國銀百萬

贖其俘干 鄂羅斯使臣亦自比革爾國都起程赴

人以和

闕約中國由緬甸西藏夾攻印度事雖未行而英夷則



惴惴甚或欲乘鄂國使臣未至速行入寇或料中國疑鄂羅斯更甚於疑他國未必遽信其言然南洋西洋聞罷市之信各埠茶葉大黃已不肯售踊貴價倍而英夷國中繳煙價龍關稅各缺銀千餘萬員諸銀肆復不出貸價復翔貴借貸鄰國數百萬充兵餉而彌利堅佛蘭西先後在粵請助兵船爲中國効力者屢見於粵中督撫及將軍章奏事則可徵也時則可乘也前廓爾喀記中以夷攻夷之議尙或迂之而不察故復述是篇而以澳門探報附其後

臣源曰由近事溯之乾隆則準酋阿睦爾薩納之來投請兵也盈廷喙拒獨高宗排羣議用之遂一戎衣而定伊犁矣土爾扈特之棄鄂羅斯來附也盈廷喙拒獨高宗排羣議受之并移檄鄂羅斯剖明曲直卒盡臣瓦刺四大部矣由遠事溯之康熙則俄羅斯所部東徧黑龍江聖祖附書荷蘭轉達鄂汗海道往還半載得報遂擴索倫地數千里矣準噶爾請授兵六萬于鄂羅斯聖祖移書宣示利害絕其糾約噶爾丹敗無可投卒潰竄死矣聖祖籌運於廊廟之間而

指麾使於數萬里之外豈不在識夷情洞敵勢哉西  
藏一陷於準噶爾再陷於廓爾喀彼時氛惡焰熾孰不  
畏道遠勞師而兩朝深維利害不惜深入撻伐恢  
域犁庭是以北攝準夷西震印度弈世而後尙有願效  
馳驅之廓夷夾攻印度之鄂部請助海艘之島國待我  
驅策同我敵愾故曰天下有道守在四夷此擊則彼應  
威立則令行事會之來間不容髮哉

附澳門月報即所謂新聞紙

道光二十年七月澳門接印度五月十四日來信

即中國四月十三日論及鄂羅斯欲攻打印度之事蓋我英

國之印度兵攻取興都哥士山近巴社國南邊各部落

而鄂羅斯邊境在此山之北三年前尚有回回四

五國亘隔英吉利與鄂羅斯屬國之間各遠數百

里今止隔一大山而已鄂羅斯近日直攻至韃韃

里之機注韃韃里謂游牧回部如哈薩克布魯特

界鄂羅斯皆是也機注皆因我等攻取阿付顏尼

部此部原屬巴社今為英吉利所據在故鄂羅人

亦攻至荷薩士河韃韃里地已約木哈臘亦韃韃

部落近阿付顏尼同取阿付顏尼部以攻打印度爲我英

國兵頭沙阿力山及馬約里治堵禦故計不行鄂

羅斯前在希臘巴社國東方部落近阿付顏尼與巴社人立約欲

收服阿付顏尼以攻取印度亦因我兵頭律屋蘭

所拒巴社即白頭回國南抵海西界都魯機北界韃韃里後詭稱收回逃散

奴僕突攻取機洼及木哈臘人皆謂鄂羅斯既得

此二地當必退兵乃又日日使人學習印度事務

又與木哈臘人立約同取阿付顏尼不知鄂羅斯

人要到何地方肯住手現聞鄂羅斯使者已自比

特革起程由韃韃里到中國

此韃韃里謂廓爾喀蒙古蓋凡各游牧部

皆謂之必懲慮中國人與英國人爭鬪并欲得

北京出 諭與緬甸人使引來攻擊不知何

時使臣能到得 北京我等切不可閉目不理

鄂羅斯人曾以兵威自黃海攻至黑海一帶地方

以廣其國境所以今日必要隄防其在荷薩士河

駐札之兵前來攻擊倘我將阿付顏尼防兵撤回

則鄂羅斯人必帶領木哈臘之兵同攻阿付顏尼

矣我等今年若將阿付顏尼王復立於加模爾城

阿付顏尼舊部即應帶兵過興都哥士大山取回沙蘇野

所失去之三部落

一曰袞都斯一曰麻爾格一曰模特散皆在阿付顏尼之北木

哈臘之南然我兵到彼必定遇鄂羅斯兵與木哈臘兵

約會夾攻我兵我兵恐即擾亂而回亦或與鄂羅

斯人相持大抵英鄂二國在阿細亞洲交戰之事

不久即至我等宜先預備出兵矣

南印度各國

南印度地毘連印度海地形如箕海中東南一島名曰

錫蘭東南西三面距海北距中印度西為孟邁一作孟孟買

邁之西海中有島曰檳榔嶼卽新埠也其餘小島星布皆無大於此者

海國聞見錄曰小白頭南入于海之地曰戈什峽東西南三面皆臨大海爲大西洋各國市埠所環據戈什峽東面沿海地名有三曰網礁臘則英機黎埔頭也曰房低者里則佛蘭西埔也曰泥顏八達則荷蘭埔頭也其西面沿海地名有二曰蘇喇曰網買則英機黎埔頭其地俱紅毛所建置此外又懸一島曰西倫大珠卽錫蘭山也此皆南天竺地



海錄曼達喇薩在明呀喇西少南由葛支里沿海陸行約二十餘日水路順東風約五六日俱英吉利所轄地至此別爲一都會有城郭英吉利居此者亦有萬人叙跋兵二三萬此地客商多阿里敏番卽來粵東戴三角帽者是也土番名雪那里風俗與明呀哩畧同土產珊瑚珍珠鑽石銀銅絲花訶子乳香沒藥鴉片魚翅玃梭牙梭牙形如小洋狗又有金邊洋布價極貴一匹有值洋銀八十枚者內山爲曉包補番曉包補者猶華言大也本回回種類其間國名甚多疆域不過數百里所織

布極精細。大西洋各國番多用之。○笨支里在曼達喇  
薩西南爲佛郎機所轄地。由曼達喇薩陸行約四五日。  
水行約日餘卽到。土產海參魚翅。訶子。棉花。猴梭。豕。內  
山亦屬曉包補。○尼古叭當國在笨支里西嶺界中。疆  
域甚小。土番名耀亞。○西嶺在笨支里少北。又名古魯  
慕。由笨支里水路約六七日。陸路約二旬。可到。爲荷蘭  
所轄地。土番名高車子。風俗與明呀里畧同。內山爲乃  
弩王國。土產海參魚翅。棉花。蘇合油。海參。生海中石上。  
其下有肉盤盤。中生短帝蒂。末卽生海參。或黑或赤各

有其盤之色豎立海水中隨潮搖動盤邊三面生三鬚各長數尺浮沉水面探者以鉤斷其蒂撈起剖之去其穢煮熟然後以火焙乾各國俱有唯大西洋諸國不產

○達冷莽柯國在西嶺西北順東南風約二三日可到疆域甚小民極貧窮然性頗淳良風俗與上畧同屬邑有地名珈補者西洋客商皆居此土產海參魚翅龍涎香訶子○亞英加在加補西北順風約五六日可到爲英吉利所轄地土番風俗與上畧同土產棉花燕窩椰子訶子又曰固貞在亞英加西北水路順風約日餘可

到爲荷蘭所轄地土番風俗與上畧同內山爲晏得尼  
加國實回回種類土產乳香沒藥魚翅棉花椰子蘇合  
油血竭砂仁詞子大楓子○隔瀝骨底國在固貞北少  
西水路順風約二日到陸路亦通風俗與上同土產  
胡椒棉花椰子俱運至固貞售賣內山仍屬晏得尼加  
○馬英在隔瀝骨底北少西水路順風約二日到爲  
佛郎機所轄地土產風俗與上畧同內山亦屬晏得尼  
加達拉緒在馬英西北陸路相去約數十里爲英吉利  
所轄地土番風俗亦與上同土產胡椒海參魚翅淡菜

內山仍屬晏得尼加。馬喇他國。

此與孟加臘音近地異此南印度彼東印

度也。母在達拉豬西疆域自東南至西北長數千里沿

海邊地分爲三國。一小葡萄。一孟婆羅。一麻倫尼。爲回

回種類。凡拜廟中不設主像。唯于地上作三級。取各

花辦。徧撒其上。羣向而拜。或中間立一木椎。每月初三

各于所居門外向月念經。合掌跪拜。稽首。土產棉花。胡

椒。魚翅。鴉片。小葡萄。在馬喇他東南沿海邊界。由達

拉豬向北少西行。經馬喇他境。約六七日到。此爲葡萄

亞國所轄地。疆域約數百里。土番奉蛇爲神。婚嫁與明

呀里同死則葬于土每年五月男女俱浴于河延番僧  
坐河邊女人將起必以兩手掬水洗僧足僧則念咒取  
水饋女面然後穿衣起又有蘇都魯番察里多番古魯  
米番三種多孟婆羅國人西洋人取以爲兵西洋人居  
此者有二萬人士產檀香魚翅珊瑚犀角象牙鮑魚嘗  
有西洋太醫院隨船至此聞其妻死特遣士番齋札回  
大西洋祖家請于國王以半俸給其家養兒女是知此  
地亦有陸路可通大西洋也○孟婆羅國在小葡萄北  
山中由小西洋水路順風約日餘可至國境王都在山

中以竹爲城疆域亦數百里風俗與小西洋同土產檀香犀角○麻倫尼國在孟婆羅北水路順風約日餘可到疆域風俗與孟婆羅同土產海參魚翅鮑魚二國所產貨物多運至小西洋埔頭售賣○盎几里國在麻倫尼北少西水路順風一二日可到疆域風俗與小葡萄畧同土產洋葱其頭寸餘熟食味極清酣瑪瑙棉花鴉片內山亦屬曉包補自曼達喇薩至郎杜土番多不食豕牛羊犬唯食鷄鴨魚蝦男女俱戴耳環○孟買在盎几里北少西相去約數十里爲英吉利所轄地有城郭

土番名以史顏色稍白性極淳良家多饒裕英吉利鎮  
此地者數千里土產瑪瑙大蔥棉花阿魏乳香沒藥魚  
膏魚翅鴉片番靛棉花最多亦南洋一大市鎮也鄰近  
馬喇他益几里曉包補卽杜諸國多輦載貨物到此貿  
易其內山亦屬曉包補。蘇辣在孟買北水路約三日  
可到亦英吉利所轄土番名阿里敏土產同上○淡項  
讀平在蘇辣北水路約日餘可到爲葡萄亞所轄土產  
同孟買○卽杜國在淡項北疆域稍大由淡項水路順  
風約二日可到風俗民情與益几里諸國畧同土產鴉



海參魚翅俱運往蘇辣孟買販賣自明牙喇至此西  
洋人謂之戈什峽總稱爲印度海土人多以白布纏頭  
所謂白頭回也遇王及官長蹲身合掌上于額俟王及  
官長過然後起子見父母亦合掌于額平等亦如之其  
來中國貿易俱附英吉利船本土船從無至中國中國  
船亦無至小西洋各國者自此以西海波洶湧一望萬  
里舟楫不通淺深莫測沿海諸國不可得而紀矣其卽  
杜內山則爲金眼回回國開其疆域極大不與諸國相  
往來故其風俗土產亦不可得而紀也

案金眼回回在  
南印度山內當

是中印度之莫臥  
爾白頭回國也

萬國地理全圖集曰馬塔刺南印度之省會也形勢在  
北極十三度五分偏東八十度二十一分海邊浪湧濤  
鳴上岸甚險建城于沙坦居民四十萬餘丁土人面黑  
而肢骸趨捷能翻飛作劇富戶耗費銀錢造廟造像信  
佛奉神不悟天主正教英國建礮臺保障防禦其屋建  
於園裡美花香草芳芬溫鬱佛蘭西軍屢次攻擊英臺  
雖然獲勝後亦必退此時英權穩立如磐斷難動移馬  
塔刺之南爲本地治利城乾隆間爲佛蘭西守據挑唆

土民肇釁驅英但東得西失惟留本城而已此省內所  
有大城如左班牙樂礮臺堅固街衢廣麗內有古王宮  
殿被英軍所攻敗者北刺利建在山頂係要隘欲上山  
嶺惟有一路防兵乘險開礮無敵敢近撒林居民織造  
布帛又製火硝骨他巴係罪犯徒流之邑骨他羅利邑  
屋宇美街衢廣西合牙巴坦昔係王都銳意欲驅英民  
出印度所募民壯軍士不勝其數因英國之兵奪險逼  
城效死力戰士王戰敗和銀一千萬兩割其國三分之  
一以免剿滅於嘉慶三年再開釁隙王募四十萬軍士

立心力戰於是英國軍士圍攻城池闖入城內其王被兵刺死遂奪全地爲英屬國

又曰網買在南印度之西邊海濱之左昔屬葡萄牙此時歸英建立省會因潮水高漲掘築船廠建造戰艦其房屋甚美其人貫白頭回惟利是圖拜日祀火不葬其屍以供鷹食恒時買賣獲益亦好布施厚賜濟故令天下庶民景仰之也。鄰地豐產棉花大半運赴中國亦有胡椒椰子珊瑚等貨海船至大者載二萬二千五百石入水甚深每年進黃埔厚運貨物省會形勢在北極

十八度五十六分偏東七十二度五十七分天氣熱昔時英人不服水土此時已經開墾安居無恙其居民共計一十七萬丁內有白頭一萬三千口前日地磽人貧今廣開通商之路每年運出物價幾百萬兩日增裕富○網買之北蘇刺城昔大興盛此際漸衰城內有禽獸院養各類老犬老牛亞麥犬八邑乃回回之城居民有十萬丁因地震倒壞屋宇所損不可勝計埔拿城嘉慶年間乃馬刺他之雄都四圍山嶺築建堡臺以防禦國敵英國攻取各臺驅其人而據其地○網買之南有葡

荷藩屬國曰俄亞者長一百二十里闊六十里於明正德五年攻取其地建城保障脅服鄰國立廟造寺養僧無算不久速廢今所留之地物產不多生意亦少○昔荷蘭據海邊之城如可陳等處互市貿易現已割予英人是以沿海各地方大半英人所轄

地里備考曰馬爾地瓦斯國一曰錫蘭山在亞細亞州之南居印度海中北極出地十五分起至七度二十分止經線自東七十度三十分起至七十一度三十分止周圍枕海地不相連環以各島共一千五百座四面相

向自南而北約二千里其烟戶所在惟四五十島地氣  
溫和寒暑相稱田土不澤隴畝稀疎穀果甚鮮椰子木  
多海出鼉龍土產珊瑚玳瑁等物商船絡繹王位相傳  
所奉之教乃回教也國都在馬劣島中乃通國之首島  
外國史畧錫蘭山島在印度東南廣袤方圓千一百六  
十二里居民一百四萬五千六百口北極出地自五度  
五十六分及九度四十六分偏東自七十九度三十六  
分及八十一度五十八分地高於海自八十丈及三百  
丈最高之峯五百處其一日亞坦之峰有石上足痕或

曰佛足蹟焉西北地低港汊皆流入之夾以最深之海  
港地形如箕舌時有甘雨地氣常如春時絕不似印度  
亢熱地多磽產桂皮加非椰子海邊尤豐居人榨其油  
市與外國土人用象如牛馬多嫩黃青藍各色美玉海  
產明珠每年約值銀二十萬兩內地多出鹽但五穀不  
登必買于印度居民有三種一爲內地之干地人土民  
多出五印度來半奉耶穌教餘則拜佛錫蘭島自古有  
名珍奇鍾萃號爲寶渚時有中國大商艘赴島貿易亞  
西亞各國皆于是港通商明時回回族類由亞拉國來



侵據此島。孝宗宏治年，與葡萄亞兵船結盟，歲貢肉桂皮，協力驅亞拉回人，遂爲葡萄亞所據。勸土民奉天主教。崇禎四年，干地王招荷蘭助驅葡萄亞，而荷蘭復奪海邊各地。開埠越百三十年，嘉慶元年，又爲英人攻據。自後全島歸英國，每年納餉約百萬，尙不足供官費。然貿易日興，所種珈琲樹，每年增至數萬石。開道院，勸民奉耶穌教。○其都城曰可倫破，在西南海邊，居民六萬。築礮臺以護之，內設大礮三百門。干地山水甚美，高海面者六百餘丈，前與北地未通，欲攻擊其酷主，不能進。

此時開通路，輻輳不絕，貿易日興，其海口日可道。丁馬里又牙利城，東南之堅城。

又曰馬地威羣島，約百八十里，偏東七十二度四十八分，並七十三度四十八分，產珊瑚，有沙石，亦出椰子、粟、多沙魚。居民勤勞，年年將椰油、鹹魚、貝子、玳瑁、穀等貨，赴印度市，以易鐵器、布、沙糖。百姓馴樸，今皆遵天主教。○臘其地，威十七島，偏東自七十二度至七十四度，北極出地自十度至十二度，惟八洲有居民，種椰子爲飲，食民甚貧乏。○尼哥巴羣島，在印度西海中，北極出地。

在七度產木料其烟瘴各島多出椰子檳榔海出蛤蜊  
榜海參香涎等物居民惰逸耶穌之徒教化之大尼國  
在此開埠因瘟疫皆斃道光二十六年再開墾○大尼  
之北爲安他曼羣島土蠻未向化居草寮食魚蠟泥身  
不衣然善用弓箭互相殺戮其林箐內有紅黑香木但  
烟瘴太重乾隆五十四年英國人在此開埠旋退去後  
或有船抵此甫及岸其土民卽突出攻擊